



KEMENTERIAN PENDIDIKAN

KENYATAAN MEDIA

**KPM MENJUNJUNG KASIH TITAH DIRAJA KDYMM SERI PADUKA
BAGINDA YANG DI-PERTUAN AGONG**

Kementerian Pendidikan (KPM) merafak sembah menjunjung kasih atas Titah Kebawah Duli Yang Maha Mulia (KDYMM) Seri Paduka Baginda Yang di-Pertuan Agong XVII Sultan Ibrahim Ibni Almarhum Sultan Iskandar sempena pembukaan penggal kelima, Parlimen Kelima Belas yang turut menyentuh mengenai pendidikan negara.

Titah KDYMM Seri Paduka Baginda Yang di-Pertuan Agong menjadi peringatan kepada seluruh warga KPM untuk sentiasa berusaha memperkasakan ekosistem pendidikan negara sebagai asas pembinaan bangsa, jati diri dan masa hadapan negara. Ini termasuk memastikan sebarang usul mengiktiraf sistem pendidikan lain mesti selari dengan Dasar Pendidikan Negara serta menerima keperluan Bahasa Melayu dan Sejarah Malaysia.

Pada waktu ini KPM sedang memberi tumpuan terhadap pelaksanaan Rancangan Pendidikan Malaysia (RPM) 2026-2035 dan Kurikulum Baharu Prasekolah. RPM 2026-2035 adalah kesinambungan kepada Pelan Pembangunan Pendidikan Malaysia (PPPM) 2013-2025 yang telah tamat pada tahun lalu. Matlamat utamanya adalah untuk meningkatkan mutu pendidikan negara demi anak-anak Malaysia.

Seperti yang dititahkan KDYMM Seri Paduka Baginda Yang di-Pertuan Agong, RPM 2026-2035 memberi penekanan kepada usaha untuk memartabatkan Bahasa Melayu sebagai bahasa kebangsaan, mengukuhkan penguasaan Bahasa Inggeris serta bahasa-bahasa lain sebagai nilai tambah kepada murid.

KPM memastikan titah KDYMM Seri Paduka Baginda Yang di-Pertuan Agong dilaksanakan demi penambahbaikan pendidikan negara dan kesejahteraan rakyat Malaysia.

TAMAT

**KEMENTERIAN PENDIDIKAN
19 JANUARI 2026**